

## 《十不二門》CBETA 電子版

版本記錄: 1.1

完成日期: 2002/11/04

發行單位: 中華電子佛典協會 (CBETA) [cbeta@ccbs.ntu.edu.tw](mailto:cbeta@ccbs.ntu.edu.tw)

資料底本: 大正新脩大正藏經 Vol. 46, No. 1927

### No. 1927 [cf. No. 1928]

#### 十不二門

##### 唐荊溪尊者湛然述

然此迹門。談其因果及以自他。使一代教門融通入妙故。凡諸義釋。皆約四教及以五味。意在開教悉入醍醐。觀心乃是教行樞機。仍且略點寄在諸說或存或沒。非部正意。故縱有施設託事附法。或辯十觀列名而已。所明理境智行位法。能化所化意在能詮。詮中咸妙為辯詮內始末自他故。具演十妙搜括一化。出世大意罄無不盡。故不可不了十妙大綱。故撮十妙為觀法大體。若解迹妙本妙非遙。應知但是離合異耳。因果義一自他何殊。故下文云。本迹雖殊不思議一。況體宗用祇是自他因果法故。況復教相祇是分別前之四章。使前四章與諸文永異。若曉斯旨則教有所歸。一期縱橫不出一心三千世間即空假中。理境乃至利益咸爾。則止觀十乘。成今自行因果。起教一章。成今化他能所。則彼此昭著法華行成。使功不唐捐所詮可識。故更以十門收攝十妙。何者。為實施權則不二而二。開權顯實則二而不二。法既教部咸開成妙故。此十門不二為目。一一門下以六即檢之。本門已廣引誠證。此下但直申一理。使一部經旨皎在目前

一者色心不二門。二者內外不二門。三者修性不二門。四者因果不二門。五者染淨不二門。六者依正不二門。七者自他不二門。八者三業不二門。九者權實不二門。十者受潤不二門。是中第一從境妙立名。第二第三從智行立名。第四從位法立名。第五第六第七從感應神通立名。第八第九從說法立名。第十從眷屬利益立名。一色心不二門者。且十如境乃至無諦。一一皆可總別二意。總在一念。別分色心。何者。初十如中相唯在色。性唯在心。體力作緣義兼色心。因果唯心。報唯約色。十二因緣苦業兩兼。惑唯在心。四諦則三兼色心。滅唯在心。二諦三諦皆俗具色心。真中唯心。一實及無。準此可見。既知別已攝別入總。一切諸法無非心性。一性無性三千宛然。當知心之色心即心名變。變名為造造謂體用。是則非色非心而色而心。唯色唯心良由於此。故知但識一念。遍見己他生佛。他生他佛尚與心同。況己心生佛寧乖一念。故彼彼境法。差差而不差

二內外不二門者。凡所觀境不出內外。外謂託彼依正色心。即空假中。即空假中妙。故色心體絕。唯一實性無空假中。色心宛然豁同真淨。無復眾生七方便異。不見國土淨穢差品。而帝網依正終自炳然。所言內者。先了外色心一念無念。唯內體三千即空假中。是則外法全為心性。心性無外攝無不周。十方諸佛法界有情性。體無殊一

切咸遍。誰云內外色心已他。此即用向色心不二門成

三修性不二門者。性德祇是界如一念。此內界如三法具足。性雖本爾。藉智起修。由修照性。由性發修。存性則全修成性。起修則全性成修。性無所移修常宛爾。修又二種。順修逆修。順謂了性為行。逆謂背性成迷。迷了二心。心雖不二逆順二性。性事恒殊。可由事不移心。則令迷修成了。故須一期迷了照性。成修見性修心二心俱泯。又了順修對性有離有合。離謂修性各三。合謂修二性一。修二各三共發性三。是則修雖具九。九祇是三。為對性明修故合修為二。二與一性如水為波。二亦無二亦如波水。應知性指三障。是故具三。修從性成。成三法爾。達無修性唯一妙乘。無所分別。法界洞朗。此由內外不二門成

四因果不二門者。眾生心因既具三軌。此因成果名三涅槃。因果無殊始終理一。若爾因德已具。何不住因。但由迷因各自謂實若。了迷性實唯住因故。久研此因因顯名果。祇緣因果理一。用此一理為因。理顯無復果名。豈可仍存因號。因果既泯理性自亡。祇由亡智親疎。致使迷成厚薄。迷厚薄故強分三惑。義開六即名智淺深。故如夢勤加空名惑絕。幻因既滿鏡像果圓。空像雖即義同。而空虛像實。像實故稱理本有。空虛故迷轉成性。是則不二而二立因果殊。二而不二始終體一。若謂因異果因亦非因。曉果從因因方克果。所以三千在理同名無明。三千果成咸稱常樂。三千無改無明即明。三千並常俱體俱用。此以修性不二門成

五染淨不二門者。若識無始即法性為無明。故可了今即無明為法性。法性之與無明遍造諸法。名之為染。無明之與法性。遍應眾緣號之為淨。濁水清水。波濕無殊。清濁雖即由緣。而濁成本有。濁雖本有而全體是清。以二波理通舉體是用。故三千因果俱名緣起。迷悟緣起不離剎那。剎那性常緣起理一。一理之內而分淨穢。別則六穢四淨。通則十通淨穢。故知剎那染體悉淨。三千未顯驗體仍迷。故相似位成六根遍照。照分十界各俱灼然。豈六根淨人謂十定十。分真垂迹十界亦然。乃至果成等彼百界。故須初心而遮而照。照故三千恒具。遮故法爾空中。終日雙亡終日雙照。不動此念遍應無方。隨感而施淨穢斯泯。亡淨穢故以空以中。仍由空中轉染為淨。由了染淨空中自亡。此以因果不二門成

六依正不二門者。已證遮那一體不二。良由無始一念三千。以三千中生陰二千為正。國土一千屬依。依正既居一心。一心豈分能所。雖無能所依正宛然。是則理性名字觀行。已有不二依正之相。故使自他因果相攝。但眾生在理果雖未辦。一切莫非遮那妙境。然應復了諸佛法體非遍而遍。眾生理性非局而局。始終不改大小無妨。因果理同依正何別。故淨穢之土勝劣之身。塵身與法身量同。塵國與寂光無異。是則一一塵剎一切剎。一一塵身一切身。廣狹勝劣難思議。淨穢方所無窮盡。若非三千空假中。安能成茲自在用。如是方知生佛等。彼此事理互相收。此以染淨不二門成

七自他不二門者。隨機利他事乃憑本。本謂一性具足自他。方至果位自即益他。如理性三德三諦三千。自行唯在空中利他三千赴物。物機無量不出三千。能應雖多不出十界。界界轉現不出一念。土土互生不出寂光。眾生由理具三千故能感。諸佛由三千理滿故能應。應遍機遍欣赴不差。不然豈能如鏡現像。鏡有現像之理。形有生像之性。若一形對不能現像。則鏡理有窮形事不通。若與鏡隔則容有是理。無有形對而不像者。若鏡未現像由塵所遮。去塵由人磨。現像非關磨者。以喻觀法大旨可知。應知理雖自他具足。必藉緣了為利他功。復由緣了。與性一合方能稱性。施設萬端則不起自性化無方所。此由依正不二門成

八三業不二門者。於化他門事分三密。隨順物理得名不同。心輪鑿機二輪設化。現身說法未曾毫差。在身分於真應。在法分於權實。二身若異何故乃云即是法身。二說若乖何故乃云皆成佛道。若唯法身應無垂世。若唯佛道誰施三乘。身尚無身說必非說。身口平等彼意輪。心色一如不謀而化。常冥至極稱物施為。豈非百界一心。界界無非三業。界尚一念三業豈殊。果用無虧因必稱果。若信因果方知三密有本。百界三業俱空假中。故使稱宜遍赴為果。一一應色一言音。無不百界三業具足。化復作化斯之謂歟。故一念凡心已有理性三密相海。一塵報色同在本理毘盧遮那。方乃名為三無差別。此以自他不二門成

九權實不二門者。平等太慧常鑿法界。亦由理性九權一實。實復九界權亦復然。權實相冥。百界一念不可分別任運常然。至果乃由契本一理。非權非實而權而實。此即如前心輪自在。致令身口赴權實機。三業一念無乖權實。不動而施豈應隔異。對說即以權實立稱。在身即以真應為名。三業理同權實冥合。此以三業不二門成

十受潤不二門者。物理本來性具權實。無始熏習或權或實。權實由熏理常平等。遇時成習行願所資。若無本因熏亦徒設。遇熏自異非由性殊。性雖無殊必藉幻發。幻機幻感幻應幻赴。能應所化並非權實。然由生具非權非實成權實機。佛亦果具非權非實為權實應。物機應契身土無偏。同常寂光無非法界。故知三千同在心地。與佛心地三千不殊。四微體同權實益等。此以權實不二門成

是故十門門門通入。色心乃至受潤咸然。故使十妙始終理一。如境本來具三。依理生解故名為智。智解導行行解契理。三法相符不異而異。而假立淺深設位簡濫。三法祇是證彼三理。下之五章三法起用。既是一念三千。即空假中成故有用。若了一念。十方三世諸佛之法本迹非遙。故重述十門。令觀行可識。首題既爾覽別為總符文可知

十不二門(竟)